

Na osnovu člana 4.2. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11) i člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05), na sjednici Državne regulatorne komisije za električnu energiju, održanoj 17. oktobra 2025. godine, donijet je

PRAVILNIK O PRIKLJUČKU

DIO PRVI – OPĆE ODREDBE

Član 1. (Predmet)

Ovim Pravilnikom propisuje se procedura za priključak novog objekta proizvođača, kupca, postrojenja za skladištenje električne energije ili hibridnog postrojenja na prijenosnu mrežu naponskog nivoa 400, 220 i 110 kV, priključak na sredjenaponski nivo 35, 20, 10 i 6 kV u trafostanicama 110/x kV Elektroprijenosa, kao i za postojeći objekt u slučaju povećanja priključne snage, dogradnje ili rekonstrukcije objekta.

Član 2. (Definicije)

Izrazi koji se koriste u ovom Pravilniku imaju sljedeće značenje:

- ‘**Cjenovnik**’ označava Cjenovnik usluga za priključak korisnika iz člana 22. ovog Pravilnika,
- ‘**DERK**’ je Državna regulatorna komisija za električnu energiju,
- ‘**Elaborat**’ označava elaborat tehničkog rješenja priključka iz člana 11. ovog Pravilnika,
- ‘**Elektroprijenos**’ je “Elektroprijenos Bosne i Hercegovine” akcionarsko društvo, Banja Luka,
- ‘**Hibridno postrojenje**’ označava postrojenje za proizvodnju i/ili potrošnju električne energije u kojem se koristi više različitih tehnologija, uključujući i postrojenje za skladištenje električne energije, a priključeno je u istu pristupnu tačku mreže,
- ‘**Korisnik**’ označava fizičko lice, pravno lice ili više pravnih lica koja nastupaju zajedno, osim operatora distributivnog sistema, koje predaje i/ili preuzima električnu energiju s prijenosne mreže, uključujući postrojenje za skladištenje električne energije i hibridno postrojenje, priključeno na prijenosnu mrežu, kao i lice za koga se provodi postupak u vezi priključenja,
- ‘**Maksimalna snaga hibridnog postrojenja**’ označava najveću trajnu aktivnu snagu koju hibridno postrojenje na mjestu priključka predaje ili preuzima s mreže, kako je utvrđeno elaboratom,
- ‘**Maksimalna snaga postrojenja za skladištenje električne energije**’ označava najveću trajnu aktivnu snagu koju postrojenje za skladištenje električne energije na mjestu priključka predaje ili preuzima s mreže, kako je utvrđeno elaboratom,
- ‘**Načelna saglasnost za priključenje**’ označava prethodnu saglasnost koja korisniku potvrđuje mogućnost priključenja na prijenosnu mrežu pod uvjetima i po proceduri definiranoj ovim Pravilnikom, uključujući i eventualne uvjete utvrđene ovom saglasnošću,
- ‘**NOS**’ je “Nezavisni operator sistema u Bosni i Hercegovini”, Sarajevo,

- ‘Obnovljivi izvori energije’** označavaju obnovljive nefosilne izvore energije (energija vjetra, solarna energija, geotermalna energija, energija iz okoliša, energija plime, oseke i druga morska energija, hidroenergija, biomasa, gas dobiven od otpada, gas dobiven iz uređaja za obradu otpadnih voda i biogas),
- ‘Odobrenje za priključenje’** označava dokument kojim se potvrđuje da su ispunjeni svi potrebni tehnički, pravni i ekonomski preduvjeti za priključak korisnika na prijenosnu mrežu, u skladu s ovim Pravilnikom i Mrežnim kodeksom,
- ‘Operator distributivnog sistema’** označava pravno lice odgovorno za rad, upravljanje, održavanje i razvoj distributivnog sistema na određenom području i njegovo povezivanje s drugim sistemima, te za osiguravanje dugoročne sposobnosti sistema da zadovolji razumnu potražnju za distribucijom električne energije,
- ‘Postrojenje za skladištenje električne energije’** označava objekt u kojem se skladišti energija,
- ‘Priključak’** označava skup vodova, opreme i uređaja za prijenos električne energije kojima se objekt korisnika povezuje na prijenosnu mrežu, od mjernog uređaja do najbliže tačke na mreži u kojoj je priključenje tehnički, pravno i ekonomski moguće,
- ‘Priključna snaga’** označava najveću trajnu aktivnu snagu koju postrojenje korisnika (a koje troši, proizvodi i/ili skladišti električnu energiju) može preuzimati iz mreže ili isporučivati u mrežu na mjestu priključenja, kako je navedeno u ugovoru o priključenju ili dogovoreno između Elektroprijenosa i NOS-a s jedne strane i korisnika s druge strane,
- ‘Skladištenje električne energije’** označava odgađanje konačne upotrebe električne energije do trenutka kasnijeg od onog u kojem je proizvedena ili pretvaranje električne energije u oblik energije koji se može skladištiti, skladištenje takve energije i naknadno pretvaranje takve energije u električnu energiju ili njena upotreba kao drugog nosioca energije,
- ‘Stvaranje tehničkih uvjeta u mreži’** označava izgradnju novih objekata, rekonstrukciju ili nadogradnju postojećih objekata, kao i prilagođavanje mreže neophodne za priključenje korisnika,
- ‘Ugovor o priključku’** označava ugovor između Elektroprijenosa i korisnika kojim se uređuju uvjeti priključenja na prijenosnu mrežu,
- ‘Uvjeti za priključak korisnika na prijenosnu mrežu’** označavaju dokument koji definira minimum tehničkih, konstruktorskih i operativnih kriterija koje moraju zadovoljiti postojeći i budući korisnici priključeni na prijenosnu mrežu,
- ‘Zahtjev za izdavanje uvjeta za priključak’** označava prijavu u definiranoj formi podnesenu od strane korisnika koji traži priključak na prijenosnu mrežu.

DIO DRUGI – UVJETI ZA PRIKLJUČAK KORISNIKA NA PRIJENOSNU MREŽU

Član 3.

(Svrha uvjeta za priključak korisnika na prijenosnu mrežu)

- (1) Korisnik je obavezan podnijeti zahtjev za izdavanje uvjeta za priključak korisnika na prijenosnu mrežu (u daljnjem tekstu: uvjeti za priključak) u slučaju namjere izgradnje novog objekta.
- (2) Zahtjev za izdavanje uvjeta za priključak obavezan je podnijeti i postojeći korisnik u slučaju:

- a) povećanja priključne snage,
 - b) ugradnje postrojenja za skladištenje električne energije,
 - c) dogradnje ili rekonstrukcije objekta u slučajevima povećanja priključne snage, razdvajanja ili spajanja instalacije unutar objekta,
 - d) promjene tehničkih parametara priključka,
 - e) promjene kategorije potrošnje,
 - f) priključenja novih ili povećanja snage postojećih vlastitih izvora napajanja.
- (3) Uvjeti za priključak se izdaju u cilju osiguravanja ostalih potrebnih dokumenata, a radi sagledavanja mogućnosti i uvjeta priključenja objekta korisnika na mrežu i uvjeta korištenja mreže.

Član 4. ***(Podnošenje zahtjeva)***

- (1) Pisani zahtjev za izdavanje uvjeta za priključak korisnik podnosi Elektroprijenosu na propisanom obrascu.
- (2) Prilikom podnošenja zahtjeva za izdavanje uvjeta za priključak korisnik plaća naknadu za podnošenje zahtjeva u skladu s Cjenovnikom.
- (3) Elektroprijenos izrađuje i objavljuje obrazac zahtjeva.
- (4) Obrazac zahtjeva se može preuzeti u Elektroprijenosu ili na njegovoj internet stranici.
- (5) Izuzetno, ukoliko obrazac zahtjeva ne omogućava navođenje svih neophodnih podataka propisanih ovim Pravilnikom, zahtjev se može podnijeti na postojećem obrascu, uz dodatno pisano obrazloženje.

Član 5. ***(Sadržaj zahtjeva za izdavanje uvjeta za priključak)***

- (1) Zahtjev mora sadržavati:
 - a) osnovne podatke o korisniku,
 - b) naziv, vrstu, adresu i broj katastarske čestice objekta koji se priključuje na mrežu,
 - c) planirani datum priključenja,
 - d) planiranu instaliranu i priključnu snagu i godišnju potrošnju/proizvodnju postrojenja korisnika, a za hibridno i postrojenje za skladištenje električne energije i maksimalnu snagu i kapacitet skladišta,
 - e) namjenu potrošnje električne energije, za kupce,
 - f) režim korištenja ili proizvodnje snage i energije,
 - g) ostale tehničke parametre u skladu s Mrežnim kodeksom.
- (2) Uz zahtjev za izdavanje uvjeta za priključak korisnik prilaže akt nadležnog organa koji posjeduje odgovarajuće evidencije, a koji obavezno sadrži:
 - a) puni naziv podnosioca zahtjeva za izdavanje akta,
 - b) naziv i priključnu snagu objekta čija izgradnja je planirana,
 - c) brojeve katastarskih čestica s nazivom katastarske općine lokacije na kojoj je planirana izgradnja objekta,

- d) konstataciju da je izgradnja objekta na predmetnoj lokaciji u skladu s važećom prostorno-planskom dokumentacijom ili da je izgradnja objekta u skladu s izmjenama prostorno-planske dokumentacije za koje je u toku postupak donošenja ili da je izgradnja objekta u skladu s novom planskom dokumentacijom za koju je u toku postupak donošenja,
- e) konstataciju da se akt izdaje u svrhu korištenja u postupku izdavanja uvjeta za priključak.

Član 6.

(Načelna saglasnost za priključenje)

- (1) Na zahtjev korisnika ili nadležnog organa uprave za izdavanje dokumenta iz stava (2) člana 5. ovog Pravilnika, Elektroprijenos može izdati načelnu saglasnost za priključenje. Sadržaj zahtjeva jednak je sadržaju zahtjeva za izdavanje uvjeta za priključak.
- (2) Kopiju načelne saglasnosti za priključenje Elektroprijenos dostavlja NOS-u.
- (3) Načelna saglasnost za priključenje važi godinu dana od dana izdavanja, a izuzetno se može produžiti za jednu godinu.

Član 7.

(Izdavanje uvjeta za priključak)

- (1) Uvjete za priključak izdaje Elektroprijenos na osnovu elaborata.
- (2) Korisnik se ne može priključiti, niti mu se može povećati priključna snaga na osnovu uvjeta za priključak.

Član 8.

(Sadržaj uvjeta za priključak)

- (1) Uvjeti za priključak sadrže:
 - a) osnovne podatke o korisniku,
 - b) naziv, vrstu, adresu i broj katastarske čestice objekta koji se priključuje na mrežu,
 - c) mjesto priključenja objekta na mrežu,
 - d) instaliranu i priključnu snagu ili maksimalnu snagu i kapacitet hibridnog i postrojenja za skladištenje električne energije, kao i planiranu godišnju predaju/preuzimanje električne energije,
 - e) tehničke uvjete za priključenje na prijenosnu mrežu,
 - f) kategoriju potrošnje, odnosno proizvodnje,
 - g) tehničke uvjete obračunskog mjernog mjesta,
 - h) planirani rok priključenja,
 - i) nazivni napon na obračunskom mjernom mjestu,
 - j) dozvoljeni faktor snage,
 - k) rok važenja,
 - l) uvjete prestanka važenja,
 - m) uputu o pravnom lijeku.
- (2) Sastavni dio uvjeta za priključak je elaborat.

Član 9.
(Rokovi izdavanja i važenja uvjeta za priključak)

- (1) Elektroprijenos uvjete za priključak izrađene u skladu sa stavom (1) člana 7. ovog Pravilnika zajedno s elaboratom dostavlja podnosiocu zahtjeva u roku od 90 dana od podnošenja zahtjeva, odnosno 30 dana nakon revizije elaborata, ukoliko ga izrađuje treća strana.
- (2) Uvjeti za priključak se izdaju s periodom važenja od tri godine.

Član 10.
(Prihvatanje uvjeta za priključak)

- (1) Nakon dobijanja uvjeta za priključak korisnik je obavezan da Elektroprijenosu dostavi pisanu izjavu da prihvata uvjete za priključak, o čemu Elektroprijenos obavještava NOS.
- (2) Pisana izjava korisnika o prihvatanju uvjeta za priključak daje se u standardiziranoj formi koju definira Elektroprijenos.

Član 11.
(Elaborat)

- (1) Elaborat obuhvaća izgradnju priključka na prijenosnu mrežu i utjecaj korisnika na prijenosni sistem.
- (2) Obim i sadržaj elaborata definira NOS, uz konsultaciju s Elektroprijenosom.
- (3) Elektroprijenos je odgovoran za izradu elaborata.
- (4) Procjene i proračuni za izradu elaborata se izvode za godinu planiranog priključenja korisnika na mrežu, koristeći standardne metodologije planiranja.
- (5) U slučaju hibridnog postrojenja, korisnik može tražiti da se elaborat radi na satnoj rezoluciji, čime se stiče jedan od uvjeta za sklapanje fleksibilnog ugovora o priključku, kojim se definiraju operativna ograničenja za slučajeve zagušenja u mreži.
- (6) Ukoliko NOS utvrdi da je došlo do izmjena okolnosti na prijenosnoj mreži usljed bilansiranja novih korisnika u periodu od dana izdavanja uvjeta za priključak do dana podnošenja zahtjeva za zaključivanje ugovora o priključku, NOS može od korisnika zahtijevati dopunu elaborata u skladu s utvrđenim promjenama na prijenosnoj mreži, prije davanja saglasnosti na zaključenje ugovora o priključku.
- (7) NOS vrši pregled, odobravanje i direktnu reviziju elaborata koji izrađuje Elektroprijenos.
- (8) Na zahtjev korisnika, Elektroprijenos, uz konsultaciju s NOS-om, može odobriti da elaborat izradi druga stručna institucija navedena u zahtjevu. U tom slučaju NOS, uz konsultaciju s Elektroprijenosom, definira i projektni zadatak za izradu elaborata.
- (9) NOS, uz aktivno učešće Elektroprijenosa, vrši pregled, odobravanje i direktnu reviziju elaborata koji izrađuje druga stručna institucija za korisnika.
- (10) Rezultati revizije se javno prezentiraju.

Član 12.
(Rješenja u elaboratu)

Rješenja data u elaboratu su obavezujuća za korisnika i predstavljaju osnovu za izdavanje uvjeta za priključak.

Član 13.

(Izrada elaborata od strane Elektroprijenos)

Ukoliko elaborat izrađuje Elektroprijenos, koriste se sljedeća pravila:

- a) ugovor o izradi elaborata zaključuju Elektroprijenos i korisnik.
- b) ugovor o izradi elaborata sadrži i odredbe o reviziji.
- c) u toku izrade elaborata Elektroprijenos može zatražiti dodatne informacije od korisnika.

Član 14.

(Troškovi izrade elaborata)

- (1) Korisnik snosi troškove izrade i revizije elaborata.
- (2) Troškove izrade elaborata, ukoliko je obrađivač, utvrđuje Elektroprijenos.
- (3) NOS utvrđuje troškove revizije elaborata.

DIO TREĆI – NAKNADA ZA PRIKLJUČAK

Član 15.

(Namjena naknade za priključak)

- (1) Naknada za priključak je iznos koji korisnik plaća Elektroprijenosu za priključenje na mrežu ili za povećanje priključne snage.
- (2) Naknada za priključak namijenjena je za učešće u finansiranju stvaranja tehničkih uvjeta u mreži za osiguravanje priključenja korisnika i za pokrivanje troškova izgradnje priključka.
- (3) Stvaranje tehničkih uvjeta u mreži za osiguravanje priključenja korisnika i izgradnja priključka u nadležnosti su Elektroprijenosa.

Član 16.

(Struktura naknade za priključak)

- (1) Naknada za priključak se sastoji od fiksno i varijabilnog dijela.
- (2) Naknadu za priključak utvrđuje Elektroprijenos na osnovu elaborata.
- (3) Naknadu za priključak snosi korisnik u skladu s odredbama ugovora o priključku.

Član 17.

(Fiksni dio naknade za priključak)

- (1) Fiksni dio naknade za priključak se obračunava po sljedećoj formuli:

Za novog korisnika:

$$N = C \cdot P$$

Za korisnika koji povećava priključnu snagu ili postojeći objekt pretvara u hibridno postrojenje:

$$N_2 = C \cdot (P_2 - P_1)$$

gdje su:

- N – jednokratni novčani iznos koji plaća korisnik radi osiguravanja uvjeta za priključenje,
- C – jedinična cijena priključne snage korisnika definirana Cjenovnikom,
- P – odobrena priključna snaga korisnika,
- N_2 – jednokratni novčani iznos koji plaća korisnik radi osiguravanja uvjeta za povećanje priključne snage,
- P_2 – odobrena priključna snaga korisnika po zahtjevu za povećanja snage,
- P_1 – prethodno odobrena priključna snaga korisnika prije odobrenja priključne snage.
- (2) Objekti koji za proizvodnju električne energije koriste obnovljive izvore energije ili postrojenja za skladištenje električne energije plaćaju 60% fiksnog dijela naknade za priključenje. Objekti koji za proizvodnju koriste hidroenergiju ovu povlasticu mogu koristiti u slučaju da im instalirana snaga ne prelazi 10 MW.
 - (3) Svake kalendarske godine, počev od 1. januara 2027. godine, procenat plaćanja fiksnog dijela naknade za priključenje iz stava (2) ovog člana se povećava za dodatnih 10%, sve do postizanja punog iznosa ovog dijela naknade za priključenje.
 - (3) Ukoliko se elaboratom ili njegovom revizijom utvrdi da se priključna snaga razlikuje od one navedene u zahtjevu, plaćanje fiksnog dijela naknade za priključenje se vrši po stvarno utvrđenoj priključnoj snazi.

Član 18.

(Varijabilni dio naknade za priključak)

- (1) Varijabilni dio naknade za priključak služi za pokrivanje troškova priključka iz člana 19. ovog Pravilnika.
- (2) Za izračunavanje varijabilnog dijela naknade za priključak korisnika na prijenosnu mrežu koriste se jedinične cijene roba, radova i usluga i standardnih normativa radova, koje Elektroprijenos čini javno dostupnim.
- (3) Ukoliko se nakon kolaudacije izvedenog priključka ispostavi da je razlika između obračunatog varijabilnog i stvarnog troška veća od $\pm 5\%$, plaćanje naknade se vrši po stvarnom trošku.

Član 19.

(Troškovi priključka)

- (1) Troškovi priključka korisnika na naponskom nivou 110 kV i više, zavisno od tehničkog rješenja priključenja datog u elaboratu, obuhvaćaju troškove pripreme, uključivo i eventualni otkup zemljišta i izgradnje visokonaponskog priključnog dalekovoda, od tačke na mreži definirane elaboratom do mjernog uređaja, kao i opreme dalekovodnog polja s pripadajućim dijelom sabirnica u postrojenju/njima Elektroprijenosa. U troškove priključka se uključuju i troškovi ugradnje sistema za mjerenje i zaštitu, kao i ugradnje uređaja potrebnih za pogon i vođenje sistema nakon priključenja objekta korisnika na mrežu.
- (2) Investitor i vlasnik priključka je Elektroprijenos.
- (3) Elektroprijenos može korisniku povjeriti izgradnju priključka uz nadzor Elektroprijenosa u svim fazama izgradnje. Vlasništvo nad izgrađenim priključkom korisnik je dužan prenijeti Elektroprijenosu bez naknade.

Član 20.

(Odnosi novog s već priključenim korisnikom)

- (1) Ukoliko se novi korisnik naknadno priključuje putem istog priključnog voda ili koristi dio infrastrukture ili postrojenja za koje je već priključeni korisnik platio naknadu za priključak, postojeći korisnik ima pravo na obeštećenje dijela varijabilnog iznosa naknade koje se uređuje posebnim međusobnim ugovorom.
- (2) U slučaju da korisnici iz stava (1) ovog člana ne mogu da postignu dogovor o visini naknade za obeštećenje, na zahtjev jednog od korisnika, visinu naknade određuje Elektroprijenos.
- (3) U slučaju priključenja svakog narednog korisnika, svi prethodno priključeni korisnici koji su platili naknadu za priključak i/ili obeštećenje imaju pravo na obeštećenje.
- (4) Pravo na obeštećenje korisnik može koristiti tokom perioda od 10 godina, počev od dana priključenja objekta.

Član 21.

(Troškovi stvaranja tehničkih uvjeta u mreži)

- (1) Stvaranje tehničkih uvjeta u mreži vrši se na osnovu Dugoročnog plana razvoja prijenosne mreže.
- (2) Investitor i vlasnik objekata prijenosne mreže, odnosno njihovih dijelova, čijom se izgradnjom stvaraju tehnički uvjeti u mreži za osiguravanje priključenja korisnika je Elektroprijenos.
- (3) Objekti iz stava (2) ovog člana finansiraju se iz tarife i fiksnog dijela naknade za priključenje.

Član 22.

(Cjenovnik)

- (1) Elektroprijenos izrađuje Cjenovnik usluga za priključak korisnika koji sadrži i iznos naknade za podnošenje zahtjeva i jediničnu cijenu priključne snage korisnika.
- (2) Cjenovnik se dostavlja DERK-u na odobrenje.
- (3) Cjenovnik usluga se objavljuje na internet stranici Elektroprijenosa.
- (4) Procedura izmjene Cjenovnika je ista kao i procedura njegovog donošenja.

DIO ČETVRTI – UGOVOR O PRIKLJUČKU

Član 23.

(Ugovor o priključku)

- (1) Na osnovu izdatih uvjeta za priključak, građevinske dozvole za priključak i/ili VN postrojenje i saglasnosti NOS-a na zaključivanje ugovora o priključku u skladu s članom 11. stav (6) ovog Pravilnika, Elektroprijenos i korisnik, na zahtjev korisnika, zaključuju ugovor o priključku.
- (2) Jedan primjerak potpisanog ugovora Elektroprijenos dostavlja NOS-u.

Član 24.
(Sadržaj ugovora o priključku)

- (1) Ugovorom o priključku uređuju se tehnički, pravni i ekonomski uvjeti priključenja na mrežu, te sve pojedinosti izgradnje priključka, budući vlasnički odnosi, kao i budući odnosi u radu i održavanju između korisnika i Elektroprijenosa nad izgrađenim objektima priključka korisnika.
- (2) Ugovor o priključku sadrži, ali se ne ograničava na:
 - a) podatke o ugovornim stranama,
 - b) predmet ugovora,
 - c) specifikaciju radova i opreme za izgradnju priključka na mrežu definiranih elaboratom,
 - d) specifikaciju tehničkih parametara opreme korisnika u skladu s elaboratom,
 - e) iznos naknade za priključak u skladu s elaboratom,
 - f) rok i dinamiku plaćanja naknade za priključenje,
 - g) rok izvedbe radova koji su predmet ugovora,
 - h) rok priključenja,
 - i) uvjete za izvođenje priključka,
 - j) način i nosioce rješavanja imovinsko-pravnih odnosa,
 - k) uvjete za stavljanje priključka u funkciju u skladu s Mrežnim kodeksom,
 - l) vlasničke odnose i vlasničko razgraničenje,
 - m) odgovornost za štetu i visinu ugovorne kazne za slučaj neizvršenja ili neurednog izvršenja ugovora,
 - n) rok važenja ugovora,
 - o) razloge raskida ugovora,
 - p) ostale uvjete,
 - q) način rješavanja sporova.

**DIO PETI – ODOBRENJE ZA PRIKLJUČENJE NA PRIJENOSNU MREŽU I
PUŠTANJE U POGON**

Član 25.
(Odobrenje za priključenje VN postrojenja i priključka)

- (1) Korisnik obavještava Elektroprijenos o završetku radova na dijelu VN postrojenja koje je u funkciji prijenosa električne energije i priključku, ukoliko ga korisnik gradi, te dostavlja:
 - a) investiciono-tehničku dokumentaciju,
 - b) potvrdu o provedenim ispitivanjima,
 - c) prijedlog programa kontrole izvedenih radova.
- (2) Program kontrole odobrava Elektroprijenos i obavještava korisnika o datumu kontrole, najkasnije sedam dana prije datuma utvrđenog za kontrolu.

- (3) Nakon izvršene kontrole iz stava (1) ovog člana, Elektroprijenos dostavlja NOS-u i korisniku zapisnik o izvršenoj kontroli i spremnosti puštanja u pogon.
- (4) Ukoliko Elektroprijenos gradi priključak, Elektroprijenos dostavlja NOS-u i korisniku zapisnik o izvršenoj kontroli i spremnosti puštanja u pogon priključka.
- (5) Na zahtjev korisnika, Elektroprijenos izdaje odobrenje za priključenje VN postrojenja i priključka, ukoliko ga gradi korisnik.
- (6) U prilogu zahtjeva za izdavanje odobrenja za priključenje VN postrojenja i priključka, ukoliko ga gradi korisnik, dostavlja se sljedeća dokumentacija:
 - a) građevinska dozvola za VN postrojenje,
 - b) građevinska dozvola za priključak,
 - c) upotrebna dozvola za VN postrojenje,
 - d) upotrebna dozvola za priključak,
- (7) Jedan primjerak odobrenja za priključenje VN postrojenja i priključka, ukoliko ga gradi korisnik, Elektroprijenos dostavlja NOS-u.

Član 26.

(Sadržaj odobrenja za priključenje VN postrojenja i priključka)

Odobrenje za priključenje VN postrojenja i priključka sadrži, ali se ne ograničava na:

- a) podatke o korisniku,
- b) naziv, vrstu, adresu i broj katastarske čestice,
- c) broj građevinske dozvole za VN postrojenje,
- d) broj građevinske dozvole za priključak,
- e) broj upotrebne dozvole za VN postrojenje,
- f) broj upotrebne dozvole za priključak,
- g) namjenu instaliranih kapaciteta korisnika,
- h) nominalni napon priključka,
- i) mjesto i tehničke karakteristike priključka,
- j) tehničke karakteristike obračunskog mjernog mjesta,
- k) vrstu i podešenje zaštita,
- l) obavezu poštovanja Mrežnog kodeksa,
- m) uvjete važenja,
- n) uputu o pravnom lijeku.

Član 27.

(Saglasnost za puštanje u pogon VN postrojenja i priključka)

- (1) Saglasnost za puštanje u pogon VN postrojenja i priključka izdaje NOS, na osnovu zahtjeva korisnika i odobrenja za priključenje.
- (2) U prilogu zahtjeva za izdavanje saglasnosti dostavljaju se sljedeći dokumenti:
 - a) protokol o podešenju zaštita,

- b) sporazum o upravljanju između korisnika i NOS-a,
 - c) izvještaj o uspostavljenoj komunikaciji i izvršenom testiranju za razmjenu neophodnih mjernih veličina s NOS-om i Elektroprijenosom.
- (3) NOS obavještava korisnika i Elektroprijenos o terminu puštanja u pogon VN postrojenja i priključka.

Član 28.

(Saglasnost za privremeni pogon objekta korisnika)

- (1) Saglasnost za privremeni pogon daje pravo korisniku na priključenje na prijenosnu mrežu u svrhu provođenja svih potrebnih funkcionalnih ispitivanja, a u skladu s Mrežnim kodeksom i testovima usaglašenosti.
- (2) Saglasnost za privremeni pogon izdaje NOS na zahtjev korisnika i na osnovu odobrenja za priključenje iz člana 25. ovog Pravilnika.
- (3) U prilogu zahtjeva za izdavanje saglasnosti za privremeni pogon se dostavlja:
 - a) dozvola nadležnog organa koja pokriva period provođenja funkcionalnih ispitivanja (samo za proizvodne objekte),
 - b) izjava korisnika o spremnosti puštanja objekta u pogon,
 - c) izjava korisnika o spremnosti za sinhronizaciju (samo za proizvodne objekte),
 - d) protokol o ispitivanju i podešenju zaštita,
 - e) sporazum o upravljanju između korisnika i NOS-a,
 - f) izvještaj o uspostavljenoj komunikaciji i izvršenom testiranju za razmjenu neophodnih mjernih veličina s NOS-om i Elektroprijenosom,
 - g) prijedlog programa puštanja u rad,
 - h) potpisan i ovjeren registar mjerenja u skladu s Mrežnim kodeksom.
- (4) U periodu važenja saglasnosti za privremeni pogon korisnik je dužan provesti sva funkcionalna ispitivanja, ispitivanja u skladu s Mrežnim kodeksom i ispitivanja u skladu s testovima usaglašenosti i rezultate dostaviti NOS-u na odobrenje.
- (5) Saglasnost za privremeni pogon se izdaje na period od 12 mjeseci. Primjerak saglasnosti za privremeni pogon NOS dostavlja nadležnim regulatornim komisijama i Elektroprijenosu.
- (6) Produženje saglasnosti za privremeni pogon može biti odobreno kada, na zahtjev korisnika, NOS procjeni da je korisnik postigao značajan napredak prema punoj usaglašenosti.

Član 29.

(Sadržaj saglasnosti za privremeni pogon objekta korisnika)

Saglasnost za privremeni pogon objekta korisnika sadrži, ali se ne ograničava na:

- a) podatke o korisniku,
- b) tehničke podatke o objektu korisnika,
- c) namjenu instaliranih kapaciteta korisnika,
- d) nominalni napon priključka,
- e) termin priključenja,

- f) uvjete važenja,
- g) obavezu poštovanja Mrežnog kodeksa i Tržišnih pravila.

Član 30.
(Testovi usaglašenosti)

- (1) Tokom važenja saglasnosti za privremeni pogon, korisnik je obavezan da provede testove usaglašenosti.
- (2) Način i vrsta ispitivanja, te dužnosti i obaveze NOS-a i korisnika su definirane u testovima usaglašenosti koje objavljuje NOS na svojoj internet stranici.
- (3) Korisnik dostavlja rezultate ispitivanja provedene u skladu s testovima usaglašenosti NOS-u na verificiranje.

Član 31.
(Saglasnost za trajni pogon objekta korisnika)

- (1) Saglasnost za trajni pogon objekta korisnika izdaje NOS na zahtjev korisnika, a na osnovu verificiranih rezultata testova usaglašenosti.
- (2) U prilogu zahtjeva za izdavanje saglasnosti za trajni pogon se dostavlja:
 - a) upotrebna dozvola za objekt korisnika,
 - b) dozvola za obavljanje djelatnosti proizvodnje električne energije koju izdaje nadležna regulatorna komisija (za proizvodne jedinice).
- (3) Primjerak saglasnosti za trajni pogon NOS dostavlja nadležnim regulatornim komisijama i Elektroprijenosu.

Član 32.
(Sadržaj saglasnosti za trajni pogon objekta korisnika)

Saglasnost za trajni pogon objekta korisnika sadrži, ali se ne ograničava na:

- a) podatke o korisniku,
- b) broj upotrebne dozvole objekta korisnika,
- c) broj dozvole za obavljanje djelatnosti proizvodnje električne energije (samo za proizvodne jedinice),
- d) tehničke podatke o objektu korisnika,
- e) namjenu instaliranih kapaciteta korisnika,
- f) mjesto i napon priključenja na prijenosnu mrežu,
- g) odobrenu priključnu snagu,
- h) podatke o obračunskom mjernom mjestu,
- i) obavezu poštovanja Mrežnog kodeksa i Tržišnih pravila,
- j) uvjete važenja,
- k) uputu o pravnom lijeku.

DIO ŠESTI – PRIKLJUČAK NA SREDNJEM NAPONU

Član 33.

(Priključak na srednjem naponu u objektima Elektroprijenosa)

- (1) Priključak korisnika putem srednjenaponskih vodova 35, 20, 10 i 6 kV na trafostanice Elektroprijenosa (u daljnjem tekstu: SN priključak) vrši se po zahtjevu nadležnog operatora distributivnog sistema.
- (2) Nadležni operator distributivnog sistema izdaje saglasnost za priključenje korisnika na srednjenaponsku mrežu, uključujući i postrojenje srednjeg napona u trafostanicama Elektroprijenosa, vodeći računa o optimalnom razvoju distributivne i prijenosne mreže.
- (3) Elektroprijenos izdaje uvjete za SN priključak na zahtjev nadležnog operatora distribucije.
- (4) Korisnici koji po ocjeni operatora distributivnog sistema mogu dobiti priključak na distributivnu mrežu napona 35, 20, 10, 6 i 0,4 kV ne mogu se pojaviti sa zahtjevom za priključenje na prijenosnu mrežu naponskog nivoa 110 kV i više.

Član 34.

(Sadržaj uvjeta za SN priključak)

Pored podataka iz člana 8. ovog Pravilnika, uvjeti za SN priključak sadrže i:

- a) podatke o operatoru distributivnog sistema,
- b) naziv, vrstu i naponski nivo srednjenaponskog voda koji se priključuje,
- c) mjesto priključenja srednjenaponskog voda u trafostanici 110/x kV.

Član 35.

(Naknada za SN priključak)

- (1) Operator distributivnog sistema plaća Elektroprijenosu naknadu za SN priključak iz stava (1) člana 33. ovog Pravilnika.
- (2) Naknada za SN priključak se utvrđuje po čeliji i naponskom nivou, a određuje se na osnovu jediničnih cijena roba, radova i usluga i standardnih normativa radova, koje Elektroprijenos čini javno dostupnim.
- (3) Na SN priključak plaća se i fiksni dio naknade iz člana 17. ovog Pravilnika.
- (4) Obaveze korisnika prema operatoru distributivnog sistema utvrđuju se aktima operatora distributivnog sistema.

Član 36.

(Troškovi SN priključka)

- (1) Naknada za SN priključak u slučaju priključenja u trafostanici 110/x kV, zavisno od naponskog nivoa, obuhvaća troškove izgradnje srednjenaponskog izlaza u trafostanici Elektroprijenosa s pripadajućim dijelom sabirnica. U navedene troškove se uključuju i troškovi ugradnje sistema za mjerenje i zaštitu, te sistema za upravljanje i telekomunikacije, koji su potrebni za pogon i vođenje sistema nakon priključenja. Izgradnja srednjenaponskog priključnog voda (dalekovoda/kabla) do trafostanice 110/x kV Elektroprijenosa u isključivoj je nadležnosti operatora distributivnog sistema.
- (2) Ostala neophodna ulaganja u mreži vrše se na osnovu Dugoročnog plana razvoja prijenosne mreže.

Član 37.
(Investitor i vlasnik)

Investitor i vlasnik SN ćelija (35, 20, 10, 6 kV) u slučaju prikljućenja u trafostanici 110/x kV je Elektroprijenos.

Član 38.
(Detaljna pravila za SN priključak)

- (1) Elektroprijenos će na osnovu ovog Pravilnika izraditi detaljna pravila i procedure koje se odnose na SN priključak i objaviti ih na svojoj internet stranici.
- (2) Elektroprijenos, tokom izrade pravila i procedura, konsultuje javnost.

DIO SEDMI – REGISTAR PRIKLJUČAKA

Član 39.
(Registar priključaka)

- (1) Elektroprijenos vodi Registar priključaka.
- (2) Registar priključaka sadrži sve dokumente koji su vezani za pojedine priključke, uključujući i njihove priloge, kao i instaliranu i odobrenu priključnu snagu objekata korisnika.
- (3) Elektroprijenos vodi i sažetak Registra u elektronskoj formi koji sadrži osnovne podatke koji se odnose na priključak.
- (4) Sažetak Registra u elektronskoj formi se objavljuje na internet stranici Elektroprijenosa.

Član 40.
(Lista - registar podnijetih zahtjeva)

- (1) Elektroprijenos vodi Listu – registar svih podnijetih zahtjeva vezanih za ovaj Pravilnik, koji su u postupku, a po kojima proces prikljućenja nije završen. U Listi se daje procjena potrebnog perioda za odlučivanje po svakom pojedinom zahtjevu, uključujući i fazu u kojoj se pojedini zahtjev nalazi.
- (2) Lista podnijetih zahtjeva se objavljuje na internet stranici Elektroprijenosa.

DIO OSMI – PRAVILA POSTUPKA I RJEŠAVANJE SPOROVA

Član 41.
(Supsidijarna primjena pravila postupka)

U postupku prikljućenja na prijenosnu mrežu na odgovarajući način se primjenjuju pravila upravnog postupka, ukoliko ovim Pravilnikom nije drugačije propisano.

Član 42.
(Rješavanje sporova)

- (1) Za rješavanje sporova nastalih u primjeni ovog Pravilnika nadležan je DERK.
- (2) Odluke DERK-a u sporovima iz stava (1) ovog člana su konačne.

DIO DEVETI – PRIJELAZNE I ZAVRŠNE ODREDBE

Član 43. ***(Prijelazne odredbe)***

Cjenovnik usluga za priključak korisnika ostaje na snazi do donošenja novog.

Član 44. ***(Prestanak važenja)***

Danom stupanja na snagu ovog Pravilnika, prestaje da važi Pravilnik o priključku ("Službeni glasnik BiH", br. 95/08, 79/10, 60/12 i 83/17).

Član 45. ***(Stupanje na snagu i objava)***

Ovaj Pravilnik stupa na snagu osmog dana od dana objave u "Službenom glasniku BiH", a objavit će se i u službenim glasilima entiteta i Brčko Distrikta BiH.

Broj: 05-28-227-21/25
17. oktobra 2025. godine
Tuzla

Predsjedavajući Komisije

Suad Zeljković